

КУГЕЗЕ ЙҮЛА МОНДАЛТШАШ ОГЫЛ

Морко рӯдӧ книгагудышто вӯдшор тылзын 8-ше кечынже йочам ашнаш налше еш-влаклан марий калык йӱла дене кылдалтше мероприятий эртен. Пайрем шӱльшым пурташ манын, Людмила Александрова ден Олеся Иванова мероприятий тӱналтыште уна-влаклан сылне такмак-влакым йонгалтареныт. Погынышо-влак марий калыкын илыш-йӱлаже нерген видеороликым онченыт.

«Морко памаш» клубын участникше Галина Васильевна Кузьмина марий Кугече пайрем йӱлам шарналтен палемдыш: «Кугече вашеш паша шуко. Лум шулен пытымек, мланде наша тӱналеш. Сурткӧргыштӧ, пӧрт ончылно, клатыште, монча да мончаончылно, вӱташте, кудывечыште — чыла вере ару лийшаш. Кугече вашеш чыла эрыктена, мушкына, чиялтена, ошемдена. Тиде кечын кечыжат модын лектеш». Галина Васильевна пайремлан келшыше мурымат сылнын йонгалтарыш.

Н.И.Казаков лӱмеш литературно-кра-



еведческий тоштерын вуйлатышыже Галина Климентьевна Сошина калык йӱлам шымлыме нерген каласкален, марий калыкын ик онгай семӱзгарже — тӱмыр - дене палдарен.

Тоштер пашаен Альберт Викторович Архипов шӱвырын ышталтмыж нерген каласкален. Шӱвыр - шӱм-кылым рончышо ўзгар, туге лыжган ызгал колта, шӱмеш куаным ылыжта, но тудым

ыштен моштышо мастар-влак шагалын улыт. Марий калыклан пайрем годым шӱвыр деч шерге нимат уке, манын ешарен.

Галина Климентьевна ден Альберт Викторович шӱвыр да тӱмыр дене моткоч устан шоктеныт. Толшо-влакын кумылыштым нӧлтальныт да сылне сем почеш куштыктеныт. Йоча-влакат шӱвыр дене шоктеныт, тӱмырымат пералтен онченыт.

Вашлиймашын тӱн шонымашыже тыгайрак ыле: самырык-влакым кугезе тукымна деке кугешныме кумылым лукташ, марий лӱмнам кӱшнӧ кучаш, марий улмына дене кугешнаш кумыландаш. Кызытсе ўдыр-рвезе-влакын чолгалыкыштым, мастарлыкыштым вияндаш кӱлеш. Тек марий калыкын пайрем радамжым, акрет годсо илыш-йӱлажым огыт мондо.

Ираида КУДРЯШОВА,
тӱн библиограф